

\* \* \*

Ինձ մի՛ խընդրիր, ես չեմ երգի  
Իմ տխրությունն ահագին,  
Աղեկըտուր նըրա ձայնից  
Կըխորտակվի քո հոգին...

5 Ո՛չ, քեզ համար այսպիսի երգ  
Երգելու չեմ ես երբեք:

Ես երգեցի սարի վըրա  
Ու չորացան խոտ ու վարդ,  
Անապատ է այնտեղ հիմա,

10 Սև՛, ամայի անապատ...  
Հառաչանքից այրված սարում  
Էլ ծաղիկ չի դալարում:

Բույր ու գեփյուռ ես կուզեի  
Եվ արշալույս ոսկեվառ,

15 Որ մի պայծառ երգ հյուսեի  
Ու երգեի քեզ համար...  
Բայց իմ սիրտը բըռնած են դեռ  
Հուր հառաչանք, սև գիշեր: